

selbst gehet es drunder vnd drüber. Vnd ob wol aller hand speiß vnd cranck von fleisch vñ fischen würt auff getragen/ auch zum vberfluß/ lassen sich doch jr etlich daran nit genügen/ sonder fahen etwan an selbers zu kochen/ der will ein speck suppen/ der ander begert ein sawmilch suppen/ die dritten wöllen eyer inn schmalz haben/ etlich essen rohe bücking/ rohe bratwürst/ vnd lassen jnen hering auß der thonnen also rohe mit eßig vnd zybeln hertragen/ die andern wöllen rhetich oder zum wenigsten den sawren Compost auß der Cappes bücten zum schlaff drunck essen. Oftermals muß der Koch weißbrot in buttern rösten/ das nennen sie der zech brüder kramat vögel/ zu Latin Scala vini/ ein gütte wein leitter / da erhebt sich aller erst das auffruchtig erbarlich vñnd ordenlich zudrincken an/ je zwen vñnd zwen bringens andern zweien / vñnd also fürt an mit gütten sprüchen vñ kurtzweil/ solchs heissen sie ein herliche/ köstliche/ gütte/ getrewe/ erbare gesellschaft/ die etwan biß an den morgen beharlich thüt weren / dan keiner wil im drück der letst sein/ so wil auch keiner die gesellschaft zerstören / oder den ersten anbruch machen. In sumā/ zum schlaff drunck würt nichts gespart/ es muß die fülle vnd vberfluß darbei sein/ dan es ist vñ bleibt der schlaff drunck ein alte langwirige rechte gütte gewonheit/ die man auß der acht nit sol/ noch lassen kan/ darumb dz vnser vñ alter die redliche alte teüt schen/ solchs also herbracht/ vnd wir der selben nachkommen/ gemelten ererbten brauch nit wissen zu endern oder abzuschaffen.

Cornelius
Tacitus de
moribus
Germano-
rum.